

七十二家集

庾開府集卷之十

周新野庾信子山著

明閩漳張燮紹和纂

神道碑

周上柱國齊王憲神道碑

昔者軒皇受姓十有四人周室先封十有五國
自爾承基纂胄保姓受氏雖復千年一聖終是
百世同宗故知昔之東京旣稱炎漢再受今之
周曆卽是鄴都中興公諱憲字毗賀突恒州武

川人也晉太康之世據有黃龍魏孝昌之初奄
荒玄菟太祖以百二諸侯三分天下函谷先登
鴻溝大定功業如此人臣以終公含章天挺命
世誕生降太一之神下文昌之宿珠角擅奇山
庭表德儀範清冷風神軒舉聳動廊廟光華城
闕未逾韶齔已議論天下事人或曰是謂弱木
一桮旁蔭數國長河一直自然千里風颭欲遠
光景將昇後魏二年封涪城縣開國公昔年五
歲也虹蜺滿野是廢當途之高鸞鸞鳴岐實始

維新之命國家光宅受圖欽明秉曆大風初卷
長沙始封周元年進爵安城郡公食邑二千戶
仍授使持節驃騎大將軍開府儀同三司開府
同於馬駿秩擬六卿驃騎等於劉蒼位高三事
宗子維城彼多慙色武城二年授使持節大將
軍都督益壽寧等二十四州諸軍事益州刺史
改封齊國公食邑萬戶公昔年十有六王武子
以上將開府未滿立年荀中郎爲十州都督才
踰弱冠方之於公已爲老矣加復營丘負海齊

桓公受賑之城岷山導江漢武帝求仙之地自
非名陵孤竹聲振沉黎豈得南至穆陵西登積
石幸無白虎之患寧待黃龍之盟邛笮畏威澱
盧仰德生爲立廟刻石頌功成都有文翁之祀
非謂生前漢陽有諸葛之碑止論身後比之今
日豈可同年而語哉保定四年與大司馬蜀國
公圍金墉城師臨洛浦則廣武營奔兵上邳山
則河橋路斷八川風俗五方名利鐵市銅街風
飛塵起天和元年徵還行雍牧公以日月之明

威神其政溱沮旣從荆岐卽又少陽用事路不
喘牛仲秋以殷民無驚水二年拜大司馬仍理
小冢宰營室殿軍器太監天官以邦國爲基是
司六典夏官以兵戈爲主專謀七德是以器械
鎮安旣包吳漢之功宮殿崢嶸彌壯蕭何之法
嘗以白露涼風務閑農隙督兵三萬出自宜陽
拔伏龍之城平姚萇之壘馬陵削樹魏將路窮
平陰聽烏齊師其邁天子冢弟禮絕羣公仁義
所徃事資道德建德元年進爵爲王仍拜大冢

宰姬旦封於曲阜不廢居中劉交國於彭陽無
妨常從豈直周召二南並居師傳晉鄭兩國俱
爲卿士而已哉匈奴突於武川燿火通於灞上
公速職巡御治兵朔方馬邑星飛龍城月動撓
雷犁之酒經畧不前失煙支之山下馬而去東
隣逆命返道敗德囚箕子於寒庫罵文王於玉
門天子將有孟津之師召公獨議公報以誕應
天命克成厥勲昔者秦昭起師於蜀直問張儀
晉武用兵於吳惟謀羊祜於是中軍無帥僉曰

有歸五年拜上柱國元戎東討給王鐵騎二萬
先襲太原斗建麾兵天離轉戰虎嘯風騰雲飛
電掩林胡棗栗詎得克饑晉陽荻蒿何能拒防
又加王精兵六萬長圍晉州然後六軍星陳萬
騎雷動中權始及前茅已戰自爾卽爲前鋒橫
行入鄴觀彼車紐槐木馬驚旋潭積甲高昆陽
之城尸封塞富平之水莫不如彼建瓴同斯破
竹一朝指揮六合大定是用光昭下武翼亮中
都足以據祖宗之宿憤解生民之怨黷方當待

彼石閭部斯玉鼓經緯天地光華日月旣而赤
烏夾日黃熊入寢實沉無祀桑林不祭宣政元
年六月二十八日薨春秋三十有四季友之亡
魯可知矣齊喪子雅姜其危哉公罷宇淹曠風
神透遠璣鏡照林山河容納置樽待酌懸鐘聽
扣聲動天下光照四鄰武皇帝以介弟懿親特
垂愛友而密謀奇策加禮敬焉常謂左右曰孔
子云自吾有回門人日親其齊王之謂也用之
作宰則萬方協和用之撫軍則四表懾伏豈直

臯繇爲士國無不仁隨會爲卿民無羣盜愛翫
書籍敦崇禮樂管絃入耳則溪谷俱調文雅沿
心則煙霞並韻養由百發落鴈吟猿應奉五行
綈綳縹帙雍容舉止抑揚談論當世以爲楷模
搢紳以爲軌範則少有壯志頗校兵書玄水降
靈轂城授策飛風長柳月角星眉莫不吟誦在
心撰成於手所著兵法凡有五卷六韜九法不
用吳起舊書三令五申無勞孫武先誠可謂有
忠孝焉有壯武焉不自驕矜謙光下物宋人獻

玉不貪爲寶百成子高守仁爲富不謂以信致
欺爲善非樂天年不享嗚呼哀哉以某年月日
塋于石安縣洪瀆川之里原隰悽愴埋於盛德
幾年丘陵摧落蘊於才良永矣乃爲銘曰

悠哉朔方逃矣窮陰山連島道地盡龜林重黎
業大伯翳功深胷其積德必有君臨太祖撥亂
喪君有君功廻地軸策動天文猶臨赤水尚復
黃雲諸侯八百天下三分公之挺生寔惟天假
翠微神降文昌星下照于四國克于兩社舟楫

江河棟梁華夏水涌詞鋒風飛文雅純深之性
地極天經忠貞之道事感百靈君親惟一臣子
惟寧忠泉出井孝笋生庭乃宰天官爲國之輔
是居上將爲天之柱乃聖乃神惟文惟武策高
開闢威移雲雨九宮神畧三術謨明天離轉陣
月德迴兵黎陽水駭官渡山驚冀州旣載東原
底平溟波欲運弱木將危中峰岳斷半海鵬垂
鳳沉丹穴龍亡黑陂臨淄廢市東武山移千齡
萬古英聲在斯

周太子太保步陸逞神道碑

公諱逞字季明本姓陸吳郡人也君子至止旣
紹虞賓鳳凰于飛實興齊國南越使者解漢帝
之衣西陵將軍覆吳王之蓋曾祖載爲宋王司
馬留鎮關中赫連之亂伏劒魏室黃河叅陵或
亡追路烏江艤船更無歸迹今爲河南洛陽人
也高祖冠軍將軍滎州刺史吳人有降附者悉
領爲別軍自是官師擁鐸更爲吳越之兵君子
習流別有樓船之陣父政驃騎大將軍儀同三

司恒州刺史中都獻公太祖扶危濟傾經綸
阻轍若之耻遠襲平原以高平霸業所基委命
甯事關中餽食非直滎陽之師河內供軍豈但
淇園之竹公秉照晉之靈降明神之德猛虎振
檻七年不驚羝羊觸藩九齡能對諸兄以公先
君愛子稱之曰仁推而襲封雖復季末大成之
心守節爰有既遭燠穴翻從壓紐太祖初封咸
谷始合諸侯以公詞令叅謀機密故得戎政克
宣師言無漏賜姓步陸孤氏委鹿輅而論都入

鴻門而舞劒方之吹律綽有餘榮出身羽林監
輕車將軍除尚書右丞官聯會計務殷平隼水
衡貫朽常平粟紅授使持節車騎大將軍儀同
三司增邑千戶尋遷駕部中大夫領吏部中大
夫歷藩部御伯東京鼎實先加鄧騭之勲西晉
官人多用山濤之啓豈若五王登朝必司賓主
之禮六龍御轡取定鸞和之節御正以官觸父
名不拜會稽有王會之名其子不爲太守博陵
有王沉之封其兒不爲刺史遷驃騎大將軍開

府入掌納言治司宗伯又爲軍司馬職居常伯
勸問於南宮位管王言連官於北斗豈止郊天
祀地龍門蟬谷之聲贊鼓頌旗白露涼風之月
闇夜有人餉羅數十匹公閉門不受行人干觸
具以聞奏朝野稱之太尉楊震直推故吏之金
涼州張奐高揖過人之馬清畏人知我無慙德
齊國通和封八受使以公有出境之才見命張
脰之禮旣陟盤軟血定楚國之連名七首登壇
反齊人之侵地是謂使乎固稱光國三輔公侯

五陵鐘鼎桐街柳市塵起風飛乃授京兆尹增
邑通前一千六百戶餘官如故上林兵息蘭池
盜靜不學王陽平生鑄金之術未同張敞終日
章臺之遊家僮暮行還得遺錢於道并白繩十
匹公訪得其主卽以還之見金於路指以示人
得錢於道留持挂樹方之今日異代同風俄遷
司會治小司馬重總六軍再操八柄考績入於
歲成論功書之年表尋授都督宜州諸軍事宜
州刺史露冕觀風停車待雨百城解印憚朱穆

之威千里相迎愛王基之德曾未朞月被勅追
還眷眷吏民不無河內之請依依故老實念黎
陽之別少陽養德前星守器尊師讓齒必俟賢
能乃授太子太保方之劉寔道高於大邦譬以
山濤榮深於小輦本有消渴之疾常餌金石自
理舊疾微增奄捐館舍茂陵之下不留封禪之
書校尉之營惟餘服食之器嗚呼哀哉春秋四
十有七建德二年五月十一日也天子以大臣
之喪躬輟聽訟東朝以師傅之尊親臨擗祭詔

贈大將軍謚某公禮也以今年正月十日塋
於京兆之高陽原夫人郁久閭西遇王姬受敬
肅恭言容令淑有聞箴盟無廢絃綆爰在盛年
先從大夜今節婦開墳松栢已拱季孫成寢丘
陵始同况復圖畫賢妃方在甘泉之室瘞埋才
子卽用高陽之原公儀表外明風神內照器量
深沉階基不測事君惟忠事親爲孝言爲世範
行爲士則畱連墳素悃悵文詞霜府錄於尚書
天官總於司會出入匡贊常帶數職身具六龜

腰怕四綬陳平密謀旣非天子所見荀彧上策
又非諸侯所聞其爲郡也惟取赤土封書其爲
州也唯以青塩換粟畱家則千樹無資遺子則
一經而已嫡子操至性過禮純孝不遺墳前之
樹染淚者先枯庭際之禽聞悲者則下銘曰

山連日觀水枕滇機富春沙起開陽柱飛大夫
屈節將軍振威南越受吏西陵解圍昔我烈祖
垂趨秦中白馬無路烏江不通笛吟鄉里琴哀
土風營州恒州擁旄世載壯節旆旂人雄關塞

直河穿趙平雲臨代生調立功沒爲畱愛降茲
岳瀆誕此貞明祥符雲氣慶合星精宮帷定策
殷柱書名忠泉暗漏孝笋寒生世屬殷周皆逢
楚漢天下三分鴻溝一半以我明略來叅匡贊
日乃再中天成兩旦遞叅三事歷副六卿天司
光宅地載謨明春官定禮夏官治兵識言默識
溫樹無名謙恭周密言行無乖忠公兕殪陰德
虵埋軍國紛總部領堊堊一作馬不入廐金不
入懷具瞻惟德高山惟仰甲觀初登龍樓初上

東國桓榮西京疎廣年齡俄頃風電相推銘旌
兩沒池柳雙迴煢煢胤子御疚銜哀身彰野火
心懼天雷月日其除榮終哀始馬歸司隸書還
太史歷對天星墳連地市山勢接飛松形蓋起
德音無絕平原忽矣

周大將軍司馬裔神道碑

公諱裔字遵胤河內溫人也昔顓頊之命始則
南正司天重黎之後又以羲和掌曆夏陽適晉
得隨會而同奔東海避秦與毛公而俱隱其後

金行受命玉筭南遷帝系極於興圖中朝至於
江表曾祖楚之晉太傅錄尚書揚州牧會稽文
孝王之次子元顯之幼弟也元顯見害之後桓
玄篡逆之初爰自齟齬客身屠釣河內道左抱
劒長號代郡城前慟悲靈祭江淮志節之士汝
穎風塵之客感激一言咸多依附旣而雲生伏
龜星出鯨魚太白經天蚩尤映野公乃收合餘
燼泣血登陴臨武牢之關據成臯之坂擁衆萬
家歸於魏室魏明元皇帝遣授平南大將軍荆

州刺史襲封瑯琊郡王尚河內公主命王承制
從賓國之儀於嘗宋兵憑陵旗鼓侵逼虎牢不
封金塘無援魏太武皇帝授王使持節侍中安
南大將軍開府儀同三司給前後部鼓吹元戎
啓行志雪冤耻登壇慷慨三軍掩泣黃河漕粟
已出石門化馬連旗將臨野坂旣而雲中析起
代郡烽燃反旆南轅途窮北畧贈征西大將軍
都督梁益秦寧荆交青豫郢洛十州諸軍事揚
州牧司徒謚貞王祖金龍封瑯琊鎮西大將軍

儀同三司吏部尚書贈司空謚康王父悅鎮南
將軍豫州刺史漁陽莊侯以荆河刺舉昔值亂
離爨起蕭牆遂終非命公遺腹載誕流離寇逆
復壁襁負深山擁樹程嬰之匿趙武從役家臣
王成之藏李燮爲備酒市遭太夫人憂苦草墳
塋以終灰燼形骸毀瘠逾於喪禮年十有五始
幹家事楹前鑿柱卽取遺書石上開松仍求故
劍出身司徒府參軍除中堅將軍員外散騎常
侍值魏室多難所在蜂起孟津以北無復封畿

嵩山以南卽爲鋒鏑公建議脩武立柵溫城函
谷西封河橋北斷長亭籍馬並入武城百里租
車咸輸溫縣太祖文帝締構關都經綸夷阻招
攜以禮懷遠以德馬文淵之擇主去隴坻而歸
身實周公之入朝在河西而奉詔大統七年蒙
授平東將軍北徐州刺史十年河內故義四千
餘家願立忠誠湏公衣錦乃授使持節領河內
太守加前將軍懷州拓境兩鎮奔波柳泉轉戰
三城授首十三年太祖召山東諸立義之將能

率衆入關者有加重賞公率先而至領戶千室
卽以爲封固辭不受其菽粟之賜或以指困馬
牛之賞將同量谷朝廷以華陽西極漢水東流
歎孟達之奔兵恠劉封之失策魏前元年移鎮
漢中除白馬城主領華陽郡守昔稱導漢今聞
上渚煙沉氷井雨歇雲門其年授大都督加散
騎常侍柱國蜀國公開金牛之道通牧馬之關
公卷甲北塞懸軍東馬遂得策預葭萌勲叅綿
竹封龍門縣開國子蒲州刺史仍領新州尋授

使持節車騎大將軍儀同三司大中正隆周授
圖天保大定以公才望仍爲舊臣遂乃義深追
遠恩隆繼絕卽改封瑯琊縣公邑五百戶仍遷
驍騎大將軍開府儀同三司都督巴州諸軍事
巴州刺史武成二年被勅赴援信州魚復道阻
屢却岑彭荆門水急幾沈吳漢公乃月峽先登
聖唐直上天子以公操履忠勤儀刑亮直乃徵
爲大御伯尋轉大御正邑一千一百戶樞機近
侍出納絲言所謂多識舊章殿中無雙者矣四

年大軍東討公所領義衆先守枳關授都督懷
州諸軍事懷州刺史偃師張幕河陽牧馬雖接
戰於富平已連營於官渡五年詔追還拜始州
刺史更討信州賊山彰尋寶渝恃險峽路五尺
絙約纔通縣水三門橋飛齊渡旣而風行草偃
谷靜山空前後平十一城獲九千餘口馬歸平
樂金輪水衡天保二年除信州刺史都督信州
諸軍事朝發白帝暮宿江陵氣振巴丘之兵威
警建平之戍五年遷潼州刺史益州柱國公降

帝子之重鎮天井之星延閣擬於叢臺岷山方
於代郡公仰稟雄謨叅謀遠略故得身預舞陽
之功位極長平之寵六年授使持節大將軍大
都督西寧州諸軍事西寧州刺史方欲關沫若
徼牂牁見夜郎之候習昆彌之戰而飛鳶墮水
馬援去而無歸金馬騁光王褒行而不反嗚呼
哀哉七年正月十日薨春秋六十有五詔贈使
持節大將軍懷邵汾晉四州諸軍事懷州刺史
夫人襄城公主魏獻帝之曾孫趙穆王之季女

王姬肅恭禴翟禮典四教蒞莊三星令淑有光
隆慮之賢足表平陽之盛生則從夫以秩死則
同穴以禮建德元年八月十二日合塋於武功
三畝原大夫墓樹以柏諸侯墳高於雉吁嗟滕
公來居此里詔謚定公禮也公資忠履孝蘊義
懷仁直幹千尋澄波萬頃逢蒙射法力牧兵書
星辰高下之占風雨逢迎之氣故得師出以律
天幸將軍者也至如官曹案牘未常煩壅戎馬
交馳不妨餘裕足使四岳彌峻三台更明在朝

四十一年身經一百餘戰凡任四郡歷八州未嘗以貨殖經懷去如始至渭南千畝之竹更懼盈滿池陽二頃之田常思止足身歿之日家無餘財素車白馬狹室崎嶇黃腸玄甲堦庭仄陋有詔冬官爲營寢室朱邑祭酹無所漢后是以賜金陳表妻子露立吳王爲之開館嗚呼哀哉世子侃孝家忠國揚名顯親是以勒此豐碑懼從陵谷植之松栢不忍凋枯銘曰

欽若曆象平秩寅賓少梁奔華地入咸秦族夷

興馬書窮獲麟玉鏡云始金行乃構象浦通關
龍沙開侯上糝石起河陽水鬪五馬南浮三星
東宿太傅作牧菴有江淹司徒避亂承制荆河
南勞推轂猶思枕戈龍媒被野蒼兕凌波莊侯
季年禍機相接誕公遺嗣崎嶇懷挾山竄趙武
家藏李燮伍員道阻燕丹路遥南奔楚塞北避
秦橋水流登隴寒風度遼有功都護則重嫖姚
懷書上馬習禮從戎陣圖六甲兵占八風藏松
寶劒射柳珮弓推誠賈復屈節廉公八翼頻飛

六條亟秉勇此仁義行茲寬猛持印山開沈黎
盜靜取甲無丘均田不井懋功賜爵上將賞官
軍中受詔塞外登壇方屠叅合更鑿臯蘭渝川
毒水燹道災氛地亡都尉離悲使君谷寒無日
山空足雲北風吹旄秋霖泣軍遺奠雙設銘旌
雨布泌水同墳平陽合墓悲哀嗣子攀號靡訴
慟甚風枝悲深霜露自此何世從斯幾年麒麟
欲闢華表中然地形樓起松心蓋圓茫茫丘壠
代代英賢

庾開府集卷之十一

周新野庾信子山著

明閩漳張爕紹和纂

神道碑

周柱國大將軍長孫儉神道碑

蓋聞放勛立而羲和昇重華登而元凱用思皇
多士既成西伯之功俊德克明乃定南巢之伐
是知惟賢非后弗食惟后非賢弗又若夫君臣
一德啓心沃心見之昌寧文公矣公諱儉初名

慶明恒州高陸人也北岳天孫之星燕河帝子
之國故多奇節甚茂華風高闕圖南二王齊軫
長城拔本十族分源高祖太尉北平王光輔五
君允釐百揆恒衛旣從淮沂其乂祖豹龍驤將
軍恒州刺史常山刺舉非無取代之符龍驤總
戎或似平吳之號父馘年止弱冠榮終解印公
以五常蘊智六氣資德乘天則策馬秉靈降神
則牽狼應象直心於物水火恬然無負於天雷
霆不懼富貴自取豈資唐舉之言聲名有聞無

勞李膺之識年十八解褐員外散騎侍郎尋授
輕車將軍羽林監太祖文皇帝駕馭天綱苞羅
英傑選公才德光佐中書諸葛亮之西歸玉壘
成三分之業管夷吾之入仕葵丘有一匡之功
天水黠寇漁陽羣盜乃遷秦州長史防城大都
督封信都縣開國伯三年滑州蟻聚保鄣沉命
靡旗亂輓乘冰渡河丞相大行臺授假節撫軍
行滑州刺史大統元年授持節西夏州刺史加
散騎常侍郅支抱馬如聞耿秉之戰單于願識

似畏王商之威五年遷使持節鎮東將軍都督
東北三夏諸軍事西夏州刺史增邑千戶改伯
爲公旣而江漢遼遠車書寂寞蜀主的顙未出
檀溪之水秦王飛雉猶向南陽之城六年以公
爲使持節都督三荆三襄南雍平信江隨郢浙
十二州諸軍事荊州刺史東南道行臺僕射楚
城隣境實有讓田吳人對營無妨贈藥部內屬
城爲人所訟公遂集文武肉袒自罰兄弟不讓
延壽責躬吏民有過翁歸引咎天子異之璽書

勞問贈賄加幣王人接踵大丞相書云此之美
事耳目之所未經歎尚無極故遣專使公善於
撫馭長於接引山藪無棄苞苴不行示人赤心
與人顏色盜不敢發民不忍欺至是將校耆老
於州城之南起清德之樓勒賢臣之頌杜鎮南
之作牧當世樹碑竇車騎之臨戎生年刻石方
之今日彼獨何人于昔戶口日增荒萊畢墾華
實紛敷黔黎茂豫但恐袞職有闕待公而補鼎
任未和湏公而正是以漢陰民望荆南杞梓並

皆上書詣闕連名乞留河內之借寇恂更慙謁
帝交州之請士燮還著上表九年授車騎大將
軍儀同三司十二年除大行臺尚書仍爲大丞
相司馬以公識度嚴明志節清儉遂改公名儉
字慶明非關書月詎待看碑幸得千畝不同二
山無廢十三年加開府餘官如故十四年除尚
書右僕射加侍中進驃騎大將軍居上星執法
在文昌之位以公才望兼而有之十五年更除
東南道行臺僕射都督十五州諸軍事行荊州

事十六年大丞相總十六軍尅清河洛公又申
分麾下叅謀幃幄高選霸僚公爲長史其年加
都督南道三十六州諸軍事餘官如故南陽文
學更遇王基章華衮衣還迎郭賀昔日伐蜀之
謀張儀與秦昭計合平吳之利羊祜與晉武意
同太祖始定成都卽有江陵之志公密獻其策
懸符深旨狼運又積梯衝立備一戰而舉鄢郢
再戰而燒夷陵遂得席卷三荆此又公之勲也
詔賞奴婢三百口太祖與公書云由公立計果

如所謀令公作鎮江陵以安蜀地後魏二年改
武川昌寧郡開國公歷陽居民非惟景丹之封
曲逆戶口豈但陳平之國其年授大將軍太和
之中曹真於府內受冊元封之末衛青於軍中
卽拜公之此比綽有餘榮詔曰吳人未復須助
謀謨今使梁王兵馬受公節度三年加都督東
南道五十二州諸軍事增邑萬戶維周革命光
宅欽明作貳天官允諧邦治元年授小冢宰保
定二年治蒲州刺史檢校六防諸軍事四年治

襄州仍授柱國大將軍餘官如故秩登四岳階
平六府豈不功重昭陽名高蔡賜控馭五十州
風行數千里拔園葵而去織婦無三惑而絕四
知一室之中未免虛白日膳之資三杯而已詔
賜絹綵一千段粟麥二千斛天和元年陝州刺
史都督八州二十防諸軍事解荊州總管餘悉
如故路出王宮城臨河曲成清陝右高視棠陰
部領宴頌晦明爲疾天和四年謝病故京薨于
私第春秋七十有八鑾蹕降臨軒懸輟樂九旒

龍旆之錫三河騎士之送詔贈太保涼夏靈銀
長河鄯甘瓜十州諸軍事涼州刺史謚曰文公
狀貌丘墟風神磊落玉山秀立喬松直上烟霞
之涯際莫尋江海之波瀾不測少遭荼苦在山
服終攀栢樹枯侵松獸死盡忠事國竭力從政
其門如市其心若水奇策密謀百僚仰止忠貞
亮直明主敬焉至如風后陰陽之占力牧星辰
之度魏公子之兵書李將軍之射法莫不成誦
在心取爲嘗用居常服翫或以布被松牀盤案

之間不過桑杯石鼎遺令山陵一無所用公私
贈祔並不得受止依太祖陵側無忘事君墩等
兄弟並至性善居喪號慕墳塋奉遵遺訓是以
衛青之塚仍陪漢武之陵管仲之墳卽接齊桓
之墓天和六年天子以四海未寧三方鼎峙有
懷將帥之志言念封疆之臣旣盡雲臺乃題麟
閣更贈公爲鄆國公邑五千戶追崇列辟事極
神魂再改銘旌恩隆封墓公在民畱愛身後見
思吉日良辰郊祠野祭儀同趙超等六百九十

七人表求立廟陳請象魏有詔許焉桂棟杏梁
綠墀青瑣按歌會舞鳳蓋霓裳南浦送而行雲
東風颺而零雨是知漢陽郡前非徒武侯之廟
臨淄城下豈獨樂公之社嗚呼哀哉乃爲銘曰
道鍾屯剝世屬雲雷地軸左轉天關北開客車
周室繫馬秦臺乃齊七政爰答三才烈祖燮諧
九龔梁棟取才逢獵求賢入夢匡贊官雲謀猷
紀鳳律定公族珪分職貢乃惟嗣德寔秉英靈
身圖斗宿面繞樞星青衿敬業童子離經信陵

虛右干木分庭忠孝純深樞機周密孔光不言
曹叅勿失溫席扇枕承顏悅膝凍浦魚驚寒林
笋出蕭蕭風政沉沉器局直似貞筠溫如瑞玉
清不置水明非舉燭馬願如羊金湏似粟上將
克昇元戎旣序夏陽三捷夷陵一舉憑軾下齊
陵江入楚鼎反歷室鐘歸大呂六卿咸事天官
是司二南作伯棠陰實治清風有頌綠竹聞詩
贈行之冊超然帝師昔侍蘭苑今陪杏林先生
契濶無違一心風雲積慘山陣連陰陵田野寂

松逕寒深夏嬰之隴僑玄之墓馬見千年車回
三步左無長樂前非武庫直望高碑增悲行路

周柱國大將軍紇于弘神道碑

公諱弘字廣略原州長城縣人也本姓田氏虞
賓在位基於揖讓之風鳳凰于飛紹於親賢之
國論其繼世之功則狄城有廟序其移家之治
則長陵有碑况復高廟上書小車而對漢主聊
城祭鳥長岳而驅燕將公以胎教之月歲德在
寅載誕之辰星精出昴是以月中生樹童子知

言水上浮瓜青衿不戲而受書黃石意在王者
之師揮劒白猿心存霸國之用魏永安中任子
都督翻原州城受隴西王節度于崑洛邑亂離
當途危逼禮樂征伐不出於天子舉賢誅暴實
在於強臣太祖文皇帝始創霸功初勤王室秣
馬蒐乘誓衆太原公仗劒轅門粗謀當世隨何
遠至實釋漢帝之憂許攸夜來卽定曹王之業
永熙中奉迎魏武帝入關封鵠陰縣開國子邑
五百戶太祖以自着鐵甲賜公云天下若定還

將此甲示寡人白水良劍罷朝而贈陳寵青驪
善馬廼軍而賜李忠並經輿服足爲連類大統
三年轉帥都督進爵爲公十四年授使持節都
督原州諸軍事原州刺史仙人重返更入桂陽
之城龍種復歸還尋白沙之路公此衣錦鄉里
榮之侍從太祖戰河橋復弘農解華山圍平沙
苑陣每有元勲常蒙別賞太祖在同州文武並
集號令云人人如紇于弘盡心天下豈不早定
卽授車騎大將軍儀同三司前魏元年轉驃騎

大將軍開府祈連猶遠卽受冠軍之侯沙幕未
開元置長平之府梁信州刺史蕭韶寧州刺史
燕淹等猶處永安稱兵漁陽公受命中軍迅流
下瀨遂得朝發白帝暮宿江陵猿嘯不驚雞鳴
卽定西平反羗本有漁陽之勇鳳州叛氏又習
仇池之氣公推鋒直上白刃交前萬死一決凶
徒多潰身被一百餘箭傷肉破骨者九瘡馬被
十槊露布申上朝廷壯焉葛屨糾糾魏有去舊
之歌零露瀼瀼周受惟新之命乃進爵封鴈門

郡公食邑通前二千七百戶保定元年授使持
節都督岷州諸軍事岷州刺史隴頭流水延望
秦關川上娥眉猶通蜀道公不發私書不燃官
燭獸則相負渡江蟲則相銜出境四年拜大將
軍餘官如故衛青受詔未入玉門之關竇憲當
官猶在燕山之下公之此授差無慙德渾王叛
換梗我西疆巖羗首竄藩籬携貳公受服於社
偏師遠襲揚於龍涸繫馬甘松二十五王靡旗
亂轍七十六柵鶉奔雉竄旣蒙用命之賞乃奉

旋師之樂天和二年被使南征帶甲百萬舳舻
千里江源水起海若來流船官之城登巢懸襲
吳兵習流長驅戰艦風成箭火倏忽凌城公以
白羽麾軍朱絲度水七十餘日始得解衣朝廷
以晉剋夏陽先通滅虢之政秦開武遂始問吞
韓之謀是以馳傳追公以爲仁壽城主齊將段
孝先斛律明月出軍定隴以爲宜陽之援公背
洛水面熊山陣中軍而踈行首乘機一戰宜陽
衝壁增封五百戶進柱國大將軍司勳之冊也

建德元年拜大司空二年遷少保姬朝三列少保爲前炎正五官冬官爲北頻頗寵命是謂賢能三年授使持節都督襄郢昌豐唐蔡六州諸軍事襄州刺史江漢之間不驚雞犬樊襄之下更多冠蓋旣而三湘遼遠時遭鵬入五溪卑濕或見鳶飛舊疾增加薨於州鎮天子畫凌烟之閣言念舊臣出平樂之宮實思賢傳有詔贈某官禮也卽以四年四月二十五日歸塋於原州高平之鎮山屬國玄甲輕車介士一依霍驃騎

之禮衛將軍之塋嗚呼盛哉公入仕四十五年
身經一百六戰通中陷及疾甚曹叅刮骨傳藥
事多關羽而風神果勇儀表沉雄學不專經畧
觀書籍兵無師古自得縱橫青烏甲乙之占白
馬星辰之變九宮推步三門伏起天弧射法太
乙營圖並皆成誦在心若指諸掌虜青犢之兵
甚有秘計燒烏巢之米本無遺策西零賊退屈
指可知南郡兵廻插標而待常願執金鼓而問
吳王橫琓戈而返齊地有志不就忠貞死焉世

子恭等孝惟純深居喪過禮對其苦寢則梓樹
寒生聞其悲泣則巢禽夜下嗚呼哀哉乃爲銘
曰

天齊水合日觀山連兵強東楚地遠西燕五鄉
咸正三王並賢靈龍更起燧象還燃自天之德
乃祖乃父維岳降神生申及甫北門梁棟西州
雲雨勇讐燕城名題漢柱公始青矜風神世載
猛獸不驚家禽能對劒學千門書觀六代有竭
忠貞無違敬愛乃數軍實乃握兵謀澆沙成壘

聚石成圖風雲順逆營陣孤虛靈雨鉦鳴燿火
飛狐淮陰受冊車騎登壇公爲上將有此同官
下江燒楚上地吞韓推功玉案定策珠盤天有
三堦公承其命國有六卿公從其政台曜偕輝
槐庭重暎匡贊七德謨猷八柄腹滿精神心開
明鏡伏波受賑樓船推轂東道未從南征不復
飲卅有井澆泉無菊功存柳林身在楠木移茵
返壘提樞山行芻靈隴水哀挽長城山如北邙
樹似東平松門石起碑字金生耿耿山河煢煢

胤子泣血徒步奔波千里孝水先枯悲雲卽起
世數存歿哀榮終始

周大將軍崔詵神道碑

公諱詵字某博陵郡安平縣人也昔者華陽之
野降龍首之神烈山之都啓龜文之繇匡周則
盟津有會佐夏則龍門始鑿西遊則起家秦相
東入則載世齊卿備乎史籍可得言矣祖辨平
遠將軍武邑郡守父楷散騎常侍光祿大夫殷
州刺史並厲風霜俱張鋒穎郎史疊迹官曹凜

然是謂鮑恢都官百城振懼葛豐握節京師歛
手公特稟英靈偏鍾山岳雄姿俊茂眉目疎朗
觀虎於檻鬣髮不驚稱象於船勝衣能對至於
拉虎驅熊摧班碎掌忘歸繁弱落鴈吟援故得
氣蓋關中威申河外解褐領單府錄事轉諮議
參軍昔當塗失御政在權門始論函谷之兵卽
起韓陵之戰太師賀拔勝作牧西荆公爲假節
冠軍將軍防城都督及南陽失守卷甲奔梁樂
毅羈旅猶思燕路陳軫愴悽終戀秦聲幸值和

隣言歸舊國授衛將軍都督封安昌縣開國子
食邑三百戶弘農趙復沙苑揮鋒進爵爲侯增
邑并前一千一百戶信珪則更受司勳穀壁則
還輸典瑞鐵馬有河橋之戰戈船有汾水之兵
除京兆太守移民下邑未學邊韶走馬章臺不
同張敞遷帥都督持節撫軍通直散騎常侍大
都督尋遷使持節車騎大將軍儀同三司都官
尚書定州大中正五曹奏事有朱穆之忠九品
論人見楊喬之直改封安國縣侯益邑合前一

千四百戶賜姓宇文改名爲訛漢王改婁敬之
族事重論都魏后變程昱之名恩深捧日遷驃
騎大將軍開府儀同三司加侍中竇憲連官單
于之寶鼎可致張寬固位渭橋之流星可識司
本七工既掌丘陵之賦司會六典乃均邦政之
才居官得人於斯爲盛進爵爲公改封萬年縣
通前二千四百戶除隴州刺史都督隴州諸軍
事隴坻路遙秦川望遠鄧仲華之不去馬文淵
之願歸尋除涼州刺史總督河西并瓜諸軍事

地似伏龍城如飛鳥燉煌實錄宛在曾襟玉門
亭障無勞圖畫有馬如羊不以入廐有金如粟
不以入懷柱國齊王今上之介弟龔行薄代問
罪河陽以公爲行軍長史叅謀帷幄中軍之司
旣舉魏絳上卿之佐實用荀林以公方之差無
慙德除使持節大將軍大都督崇德安義建忠
九曲安樂三泉伏流周張平泉固安蠻通谷凡
十三防禦熊和中三州黃蘆起谷王晏供超率
羊溫狐交河大嶺避雨水柵寺一十成諸軍事

崇德防主宜陽上地更有秦兵熊耳山前還逢
積伏用是連營幽谷獵騎黎陽威振兩河名陵
三晉改封安平縣公淮陰一國韓信之故人戶
牖萬家陳平之鄉里公此衣錦足爲連類建德
四年正月十日薨於長安之永貴里私第春秋
六十有四詔贈鄜延冊綬長五州諸軍事敷州
刺史謚曰莊公禮也卽以其年二月二十四日
塋于京兆平原鄉之吉遷里北陵追遠大司馬
有賜綬之恩西京贈行冠軍侯有詔塋之禮鳴

呼哀哉世子儀同弘度生事以禮死塋以禮愛
親有王祥之孝同氣有姜肱之睦百行之本於
斯備焉况復松楸深沉旣封青石之墓丘陵標
榜源勒黃金之碑乃爲銘曰

華陽之神厲山之祖鳳野丘周龍門佐禹日浴
溟池山浮海浦甫穆霸國營丘樂土胤斯宗邑
承此壤王移封東武就君安陽中軍節目鎮北
芒鋒商飈獵草電火驅霜公之輪煥繼體貞幹
儀表丘墟風神墻岸孝有至德忠能匡贊不廢

橫琴無妨欹案旣班三事又貳六官衛青受詔
韓信登壇長城馬窟廣武兵欄軍吏無犯營民
不寒乃用六謀乃論三策城壘向背星辰主客
劍起沉犀弓關伏石楚后讓盟秦君還璧百齡
危脆千仞摧藏諸侯地裂邊將星亡輕車騎士
玄甲黃腸社如齊地廟似桐鄉銘功贊德碑闕
相望

庾開府集卷之十二

周新野庾信子山著

明閩漳張爕紹和纂

神道碑

周車騎將軍賀婁公神道碑

昔者軒丘命氏初分兄弟之姓若水降居始建
諸侯之國自是以官爲族因地爲宗水派枝分
其可知矣公諱慈字元達本姓張清河東武城
人也仕於周張仲爲孝友謀於晉張彥爲賢臣

韓有開地則五世強國趙有孟談則三卿不戰
祖慶少習邊將仗智勇雖復五車竹簡不取
博士之名一卷兵書卽以將軍自許角端在手
必無齊魯之侵蓮花插腰甚得蛟龍之氣爲車
騎大將軍儀同三司散騎常侍霸城縣開國伯
贈河州刺史父瓌公子公孫有鑑基於天下良
弓良冶有世業於家風書則百家可知劍則千
人可敵三槐以勗鼎象物知其神茲五等以桓
珪班瑞守其宮室君以才望兼而有之終於使

持節車騎大將軍儀同三司散騎常侍武定縣
開國公贈河州刺史惟公秉山岳之靈受星辰
之氣年在髫髮甫就勝衣竹馬來迎已知名於
郭伋羊車在道卽見賞於王澄豈直童子明經
書生說卦而已至如禪河清論秋水高談故以
辨折龜林聲馳鹿野國家官族君爲首姓起家
車騎大將軍儀同三司襲爵爲公增邑合一千
六百戶弱冠登朝傳呼甚寵漢魏台鼎故無此
比中朝方伯罕有其年大冢宰任總機衡是勤

王略惜君忠壯委以爪牙乃領左廂親信出爲
梁州防主華陽西極漢水東流巴濮旣寧沈黎
卽靜保定四年王師北伐以君驍勇被召將兵
師下宜陽身登函谷將燒白馬之城以覆烏巢
之壘旣而中途甚雨未獲圍原軍師聞喪不成
侵宋柱國趙王令上之第九弟也文則河間上
書武則任城置陣作鎮岷丘揚旆錦水白虎之
俗難安黃龍之盟不定以君智略入佐中權天
和元年授使持節大都督治柱國總府司錄仍

轉司馬餘官封如故相如西喻鏤石於靈山武侯南征浮船於瀘水方之今日彼獨何人九品課工爲上之下四年入朝歸事宰旅卽受載師大夫將命齊國尋盟出境卽用和鄰之儀入國聞喪仍從會葬之禮可使南面此之謂乎尋以本宮入治軍正至如渭水兵書在心爲志軒丘陣法聚石成圖旣得師不疲勞兵無怨讟入陪中禁更領儀同邸客城池門闌戶籍咸資巡警並用司存帝城近臣公室密戚如逢司隸似畏

都官旣而孤城鄭姬不相其年巴水深翁不醫
其疾春秋三十有三奄捐官舍呂子明之疾甚
歎軫吳王阮元瑜之長逝悲深魏主有詔贈某
官禮也以建德四年三月日歸塋於河州苑川
郡之禁山公六郡良家西河鼎族地壯金行人
雄塞氣兵書七卷河水浮來射法三篇天弧夜
下鋒旗不息刀斗恒驚猶得馬上讀書軍中習
禮太史子義善於謀策諸葛公休長於撫馭四
代儀同三司七世河州刺史鐘鼎成列冠蓋連

陰所謂生爲貴臣死爲貴神者也但以遊魂久
客反塋途遠道阻山長妻孤子幼哀聲滿野愁
氣連雲况復松檟飄飄方臨武威之戍丘陵廻
遠直對臨洮之城馬援亡於武溪尸柩返於魏
里梁鴻死於會計妻子歸於平陵嗚呼哀哉崎
嶇遠矣昔者繁昌祠前卽有黃金之碣德陽墓
下猶傳青石之碑是謂勒功乃爲銘曰

七葉佐漢五世相韓忠臣入仕孝友當官青城
仙洞黃石祠壇臺堪走馬書足廻鸞武定風飈

霸城嚴肅並馳雙傳俱分兩竹重世刺舉連鑣
袞服草靡青丘風馳赤谷世不乏賢挺茲上嗣
孝有三德忠無二志劒足身挺書堪面試旂節
旣秉高蟬且珥龜轉印函馳盤綬笥左右將軍
前後常侍繼踵五侯因循三事旂旃九坂艫舳
雙流還驅木馬更引金牛江波錦落火井星浮
樽酒望帝安歌蜀侯受脤河陽偏師洛浦署陣
成臯連旗廣武朝兵戡竄夜營多鼓箭起六麋
鋒摧九虎倏忽人世俄然今古崇發兩星鑒驚

二豎遊魂通夢言反舊塋紫泥賜冊黃腸贈行
途登石紐路入金城寒關樹直秋塞雲平劒埋
合柱書藏鑿楹武侯爲廟樂公爲社雲蓋低臨
霓裳紛下碑枕金龜松橫石馬永矣身世畱名
華夏

周上柱國宿國公河州都督辛威神道碑
公諱威字某河南洛陽人也舊姓辛隴西人基
若水之源纂商丘之胄邑于大亳實定其居封
于小辛乃成其姓是以山川被髮辛有得見事

之機八卦占爻辛廖有知人之鑒佐治以東都
上將魏帝解衣武賢以西國功臣漢王推轂祖
大汗渭川刺史考生河州四面總管大都督隴
右貴臣河西鼎族公侯踵武岳牧連鑣並得聲
振長榆名雄高柳公秉靈山岳誕載星辰結髮
巋然齟年成德澄波萬頃建標千仞鋒穎旣高
光芒已遠青衿學劍旣爲人主所稱童子論兵
卽在中軍之策永熙元年入仕蒙授直盪都督
太祖文皇帝雪舊君之耻連西伯之功始裂鴻

溝初登函谷公擢衣沐髮杖劒轅門撒洗足而
相迎下賓階而顧問自此卽居帳內仍爲直寢
授寧遠將軍羽林監白土縣開國伯邑五百戶
大統元年從迎大駕進爵爲侯增邑三百戶加
冠軍將軍散騎常侍轉大都督公善於用兵長
於撫御自攻洛陽定弘農戰河橋平沙苑肩及
衝鋒前無橫陣况以弦木六鈞函犀七屬門多
懸冑箭必中鞍山積礮械谷量牛馬軍吏計功
司勲賞策授使持節銀青光祿大夫進爵爲公

增邑八百戶昔者受律赤符韓信當乎千里治
兵白帝張飛擬於萬人比跡今日公之謂也五
年授使持節都督揚州諸軍事揚州刺史浮於
江海達於淮泗篠簜旣敷瑤琨卽序十三年授
車騎大將軍儀同三司尋遷驃騎大將軍開府
仍賜姓晉屯卽爲官族入陪武帳出總戎韜置
府於陽關張旃於瀚海故得上書於漢卽用同
宗爭長於周還無異姓十六年授鄜州諸軍事
鄜州刺史公頻領兩牧風政神明虎去西河梟

移東郡河湄瑞氣特表蕤平鄺祀神光偏明正
直及乎魏終天祿周受惟新明命已遷彝倫或
華周元年改授大將軍抱罕郡開國公增邑一
千戶軍中受詔非論北伐之功大將登壇無待
東歸之策置陣太平開陰晉之道連兵廣武納
滎陽之城校戰丹山移營白壁莫不勇冠三軍
名凌五將保定四年授寧州總管掌其北門旣
爲鄭國所委捍其西鄙無懼秦亭之逼是以築
平綱之城衛人拱手戍滎波之澤梁氏寒心朝

廷與公有內外之親令公從戚里之貴乃以魏文帝女爲公夫人遂得長門之左別開公主之園濯龍之傍便有王姬之館五年被徵入京拜少司馬期於司武以公爲魏絳佐於中軍以公爲荀首豈直謂之鶉火稱之緡雲而已哉其年被使領兵出西涼州奉迎突厥皇后紀制繻求卿爲君逆稱族而行尊君命也天和元年授柱國拜大司寇楚之柱國方之南火軒之司寇譬以西雲總授於公能官人也建德二年授少傅

四年授寧州總管都督七州諸軍事卽爲河州
大中正公之桑梓本於此地再爲連率頗仍衣
錦襄城龍種更及池臺桂陽仙人還歸鄉里故
老親賓酣歌相慶安車駟馬天下榮之宣政元
年授上柱國更加少傅配于上相卽陪玄扈之
圖居于京師實有杞橋之策改封宿國公食邑
戶前五千戶射鴻舊圃舞鶴餘城旣浮酸棗之
河聊對淇園之竹來朝建章則天子降席出遊
戚里則郡公下堦是以行滿天地名聞四海方

當光輔五軍參謀七政天厲弗戒薨于所居春秋六十有九柳莊告殯領社稷之臣鄭僑云亡得諸侯之禮詔贈某官謚某公禮也以今開皇元年七月某日反塋於河州金城郡之苑川鄉山行隴底地入塞原望積石以緣河臨崆峒而下坂玄甲黃腸崎嶇亭鄣及云莫徹方勞榆沈若夫樹反壤也封夏屋焉終湏頴川之碑乃見華陰之碣世子儀同永達孝性有聞居喪得禮嗟海變而田成懼山飛而地絕勒石墓田仍銘

云爾

少典之孫玄王之子虹貫於月金承於水降及
於周公侯復始風俗氣候山川表裏河連積石
山帶崆峒秦亭北上漢使西通金行氣壯地勢
人雄稜稜高節凜凜踈風祖考藩屏濁河清渭
兩地謨明變流光賁水無別色雲無異氣爲吏
爲民惟懷惟畏公之嗣世實秉英靈降神中嶽
廻文列星鸞翔鳳顧珠角山庭臣深義本子極
天經洛城戰陣河橋旗鼓箭飲石梁劒燃銅樹

英麗六麋俱抽雙虎王門開郡陽關置府再爲
上台兩爲少傅模範帝師經綸國步允襲峻德
欽明審諭不吝車茵誰言溫樹天道茫昧年齡
倏忽上將星開功臣鼎沒九原陵阜三河甲卒
地險龜林營危馬窟西州永別北關長辭山張
虛蓋野祭空帷陵原地迴松路風悲銘于碣石
勒以貞龜

周兖州刺史廣饒公鄭常神道碑

唐朝以元凱並進十有六人周室以昭穆先封

十有五國發源纂冑葉派枝分開國承家未聯
璧合是用克明峻德思皇多士盛德有後公其
裕哉公諱常字子元豫州滎陽人也周宣中興
然後樹賢建戚鄭武有國然後保姓受氏荆衡
之賦千乘莫敢加兵號會之封十城翻爲獻邑
况復郊門致騎先迎內史之賓南宮旦朝獨識
尚書之履祖思慶建威將軍山陽太守建威取
曹仁之號可以定名山陽有王暢之賢足觀風
俗考項銀青金紫方於溫羨傳祗鎮南征東比

於劉弘荀顗報功之冊則槐路是儀贈行之典
則荆河惟牧公弱齡早慧幼學夙成立必正方
言無勦說青衿智勇卽埋雲夢之蛇童子仁心
已愛中牟之雉始遊庠塾不無儒者之榮或見
兵書遂有風雲之志出忠入孝事盡於心脩身
立名理窮於性大統三年起義華陽先登廣武
浮潛逾沔入渭亂河蒙授永安縣開國男輔國
將軍自爾長從太祖入爲帳內都督河橋接戰
秋水則三月不流洛城揮鋒金墉則一月路斷

西京不賓羗戎侵軼城如飛鳥地有伏龍公以
金僕裁抽靈鈺暨舉蜂目已奔狼心遂革遷平
東將軍帥都督十五年襲父封魏昌縣開國伯
傳大都督魏後三年授使持節車騎大將軍儀
同三司黃權受詔嘉其入魏之功實憲當官賞
其平戎之策公之此授勲庸著矣進爵廣饒縣
開國公邑五百戶保定三年授都督羅州諸軍
事羅州刺史仍領金州兵馬應接上庸公於文
谷路溪澗崢嶸巖崖豁嶮山窮水斷馬束橋飛

中孚旣開雙城卽款往者申息盡掩江黃無援
涪陽極浦亟犯風塵夏首西浮頻遭鋒鏑公以
伏波受賑樓船誓衆入橫江之陣進下瀨之兵
越客文身湛盧終去吳人長鬣餘鯢遂遠建德
四年授使持節開府儀同大將軍公孫敖下光
祿之塞諸葛誕勒九都之山公之處焉差無慙
德四方雜俗天下殊風以君廉能使燕觀察馳
傳擁節揚旂持斧旣乘驄馬仍被繡衣羣盜累
足貴戚斂手鄉亭畱宿幸無歸忌之疑公車奏

事寧有反文之日是使陽球司隸無所申威鮑
恢都官因人成事高祖武皇帝以仲春誓衆甲
子濟河公伐劒六軍披圖八陣譬彼張遼前鋒
而報魏主方之耿弇先戰而待蕭王及乎九州
適同四隩旣宅遂得功叅勇爵名入司勳授上
開府增邑五百戶加以舉功行賞推恩分邑兼
乘而反光乎譙郡之城載寶而歸照於臨漳之
水卽日賜姓宇文與國同族婁敬上書於鹿輅
項伯舞劒於鴻門公之此榮足爲連類以公績

著屯險誠貫風霜其年授使持節督東徐州諸
軍事徐州刺史宣政元年授都督南兖州諸軍
事南兖州刺史作牧濟河風行於雷澤建旟海
岱化被於淮沂襜帷入境貪殘者解印冕旒從
政仁義者郊迎豈直白石開渠青鹽換粟祥雲
入境行雨隨軒而已哉在任邁疾薨於方鎮皇
甫嵩監御斯牧賢能刺史荀中郎連率此則中
興方伯英聲茂實公之有焉詔贈某官謚某公
禮也以大象二年十一月十日歸塋於滎陽之

某山舊墓九原悽愴趙文子其何言駟馬悲鳴
滕成公其已遠若夫勒鼎刊碑銘功頌德陳其
令範必在生前嗟乎此之樹碑異乎洙泗之水
此之勒石異乎燕然之山嗚呼哀哉乃爲銘曰
高陽之子少典之孫蒼林遠邁若水遙源公侯
綏始鍾鼎逾繁承基纂胄建國開藩我壯我武
旣公旣侯緇衣出鄭卿士歸周魚陵北上榮澤
東流河移酸棗雨粟陳畱祖守南邦考鎮東部
兩龜爲印雙虵結綬日察陰陽星占長柳是曰

世載其名不朽事親之道孝以立身事君之道
忠以立仁今君嗣德一此君親如松之茂如竹
之筠功叅荊棘職主兵戈北臨青嶺南通白波
直雲橫塞長星渡河陳開沙斷師移龜多舉功
行賞封疆受位宮室鏤珪山河分地決勝千里
謀深計秘建武功成名連星次建旗濟潔擁節
龜蒙既蠶桑土實撫梧桐野無異器河無別風
吳亭楚塞莫敢讐兮倏忽身世俄然松檟路轉
銅魚山廻石馬武侯之廟樂公之社望此高碑

悽然淚下

周隴右總營長史贈少保豆盧公神道碑

君諱永恩字某昌黎徙何人本姓慕容燕文帝
號之後也朝鮮微子之封孤竹伯夷之國漢有
四城秦爲一侯其先保姓受氏初存柳城之功
開國承家始靜遼陽之亂自天市星妖連津兵
覆尚書府君改姓豆盧筮仕於魏祖代左右將
軍魏文皇帝直寢父長少以雄畧知名不幸早
世屬朝以公兄弟佐命義存追遠保定二年有

詔贈柱國大將軍涪陵郡公是知春雨潤木自
葉流根西伯行慶推存及歿公以山岳精靈星
辰秀異氣侔鍾鼎聲感風雲觀於秦兵尚稱童
子對於楚戰猶在青衿太祖文皇帝乘時撥亂
奄有霸業潁州從我舊愛無渝春陵故人相知
惟眷魯秦二年關西建義授殄寇將軍奉迎大
駕賜封新興縣伯邑五百戶開新安之部還移
揚僕之關解弘農之圍更入劉昆之郡援桴併
轡並預前驅大統三年有沙苑之戰四年河橋

之役介冑蟻虱戎馬生郊公靈變愈長風颭更
勇隱若敵國差強人意授龍驤將軍中散大夫
八年授直寢右親信都督尋轉大都督加通直
騎散常侍十六年授使持節車騎大將軍儀同
三司魏元年授驃騎大將軍開府儀同三司鄧
騭以漢朝親戚始授中台黃權以魏國功臣初
登上將公頻煩寵授朝野爲榮二年都督成州
諸軍事成州刺史尋加侍中外總連帥振威百
城內叅常伯榮高八舍于昔隴坻黠羗昔穿上

谷榆中羣賊或聚漁陽公卷甲星馳長驅千騎
迴洛兇徒望風草靡瓜州豪傑束手歸軍後魏
元年改封龍支縣侯三年朝廷使大將安政公
隨突厥吐谷渾歸國河鄯二州屬當路首公領
騎八千以爲戎防南通丹粟西望白蘭關塞無
虞公之勲也周元年授都督鄯州諸軍事鄯州
刺史其年改封沃野縣公增邑千戶二年授隴
右總管府長史武成元年都督利涉汶三州諸
軍事利州刺史五年兵破文州陽陣蠻仍平瀘

永以保定元年將兵破巴州恒獵獠度瀘五月
葛亮有深入之兵長坂九迴王遵有忠臣之路
霜電不驚水草無乏天幸將軍斯之謂矣其年
授司會八法斯掌九賦是均事繼歲成功叅日
要三年遷授隴右總管府長史公屢勸英蕃頻
相大府北海入朝仰以對問東平謁帝因而定
禮遂使馬首懷燕不無樂毅蕃臣擬漢或多田
叔兄楚國公以叅和挹讓莊贊樂推建國開都
奄荒南服求以先封武陽郡三千戶益公沃野

之封朝廷以兄弟相讓不無前史推恩分邑有
詔許焉增邑并前合四千七百戶旣而六氣相
犯五聲相觸靈壽不終遊魂且變薨于官舍春
秋五十八詔贈少保幽冀定相等五州諸軍事
幽州刺史謚曰敬公禮也天和元年二月六日
塋於咸陽洪濱州大夫墓樹以柏諸侯墳高於
雉嗚呼哀哉公資忠履孝蘊義懷仁直幹百尋
澄波千頃畱心職事愛玩圖籍官曹案牘未嘗
煩委戎馬交馳不妨餘裕兄弟公侯國朝親戚

宜春有湯沐之盛濯龍無流水之譏渭南千畝
之竹尚懼盈滿咸陽二頃之田常思止足立身
則十世可有遺子則一經而已刺史賈逵之碑
旣生金粟將軍衛青之墓方畱石麟乃爲銘曰
朝鮮建國孤竹爲君地稱高柳山名密雲遼陽
趙裂武遂秦分寶珪世冒雕戈舊勲名稱賓賓
言謂身文挺此含璋降茲岐嶽有犯無隱王道
正直唯愛唯敬永成悅色枕籍禮闈畱連學殖
策叅帷帳功披荊棘韓陣揮戈齊城憑軾豹策

乃建龍韜同啟校戰岐陽中威隴坻城壘畫地
山林聚米上馬諭書臨戎習禮賈復開營廉公
屈禮從容傳會占對造請用此廉平終茲寬猛
綠林兵息潢池盜靜名振赤山威高青嶺玄獸
浮河飛蜺出境災氣生隴毒水侵涇朝傾地鎮
夜落台星石壇承祀豐碑頌靈渭城高栢昌陵
下亭須知地市爲讀山銘